

微尚齋詩集初編

微尚齋詩集初編卷三

代州 馮志沂 述仲

戊午

人日繡山年丈招同高寄泉大令吳子貞孝廉及朝鮮
吳亦梅安桐齋飲分韻得盤字

筍香魚美簇春盤佳節愁心強自寬
載酒客添新伴侶談詩人有古衣冠
萍蓬聚散浮生易天地風塵此會難
不爲重闥限車轍竟須沈醉向更闌

卽事

曉枕寒多夢不成
閑階負手百回行
雲含雪意兼雨意

從仙詩集卷之三
風送春聲和市聲案牘暫拋宜縱酒江湖極望未銷兵
憂來欲問君平卜嘯傲何緣得此生

寄朝鮮李藕船

海邦甚清晏況復早懸車歲月供耽酒雲山對著書更
聞詩律細應念故人疏顛顚賴春明客何年返舊廬
亦梅索題天竹齋圖

吳子海邦彥觀光來帝州千金購亡書插架如鄴侯
嘉卉手親植云可祛鬱攸青柯綴朱實掩映珊瑚鉤是
物名慎火聞出炎海岷何年落東土媚此曲室幽主人
愴相對把卷方科頭滄溟久不波宦隱皆優遊鄙人屬

有念所念非身謀焉得樹護草陶然忘百憂

梅先生祥祭日霞舉邀同伯韓繡山青士少鶴爲位以
祭賦呈霞舉

君恨不識宣城翁翁之顏狀吾能說瘦榦疏鐸如古松
翦水雙瞳更清絕余君朱君昔要我隘巷城西漫通謁
以蠡測海筵撞鐘我縱不慚翁豈屑何期臭味無差池
初若難親久方悅曹司退食一相訪快若炎蒸對冰雪
翁之文章學諸子入百萬軍持寸鐵訂詩著墨亦無多
洞垣一方見癥結一語真堪百日思十年豈意千秋別
寄書索硯未報章聞道郎君已衰經感君風義似古人

瓣香冒爲南豐熱平生眞率意可仿肆禮無煩表綿蕪
當時坐客餘二三感舊難禁五情熱夢中魂魄尙相親
更欲從翁問詩訣

繡山年丈屬題其尊人俊峯先生母宜人二圖

瓢城餞別

不飲瓢城水飄然返故園琴書充宦橐父老具壺飧大
府能行意思愚民自感恩時危須長吏往事那堪論

寒宵稱藥

昔聞孝婦能乳姑於傳有之今則無孔君示我稱藥圖
再拜展讀聲淚俱我昔從軍母倚閭歸來一月萱草枯

婦之事姑有如此嗚呼吾生亦人子

葉潤臣城南買醉圖

身後千載名生前一杯酒何如黃金印懸肘窮通有命
不早知局促塵埃行白首欲築糟邱作幸民側身天地
足沾巾東皋沈醉三閭醒誰是肝腸木石人

鵬南和余奇字韻依韻答之

童年骨相頗權奇豈料摧頽值此時粗涉文章甯免俗
不工趨走自緣癡三春百卉爭新節十載重泉感故知
更欲與君焚筆硯古來寒餓例耽詩
秩滿注官知府鵬南以詩見賀賦答

我慣疏慵已成性時方俶擾正須才爲問銜書二千石
何如日飲三百杯塞翁失馬事翻覆鄭人得鹿心驚猜
一官中外底稱意羨殺柴桑歸去來

悼敬之

汝母來京師見汝始扶牀十載遂頽然嗜古能文章治
經守馬鄭作賦追班揚探丸起人死餘事亦殊常乾坤
忽瘡痍畿輔頻旱蝗爲粥活饑民高義傾冠裳書生憂
國心上可質彼蒼謂宜有天道報汝壽且康一疴旬日
閒促召來巫陽云何此酷虐先事無機祥哀哉孰使然
人生安可量慈母垂白髮少妻浣紅妝瘦弟哭失聲恨

不借汝亡稚子未知悲麻衣號索漿觸目不忍覩沈痛
燔中腸與汝雖舅甥恩情猶子行薄德百不堪貽汝以
咎殃汝母言汝夢旌旗擁舟航其中多羽人迎汝歸仙
鄉仙鄉定何許塞悲以荒唐

友人屬題子貞同年畫扇用山谷墨竹韻

煖叟學昌黎我非湜籍輩豈云驂雲龍僵走常不逮餘
事寫幽蘭神動天與會有如平原書筆力透紙背吾觀
月印川攬取無不在君書逼古人畫乃與書配腕有鬼
縱橫心泯世憎愛詩書源竟委道義中襍外潑墨聊戲
劇事半功已倍憶君淡蕩姿語默異時態幽幽一叢花

其人宛相對所恨別經年與君空老大

寄家兄

九衢塵中五畝宅萬里橋邊四年客高曾以下吾兩人
地角天涯竝頭白四十五年爲弟兄未有廿年相合并
功名富貴亦安在喜君五十頻添丁我歸君出如相避
我又出山甚非計大兒讀書雖不多能諷羣經九千字
小者亦非豚犬兒悔不畱身自課之暫司衮衮富材彥
安所用此迂儒爲太息鄉鄰非舊俗競覩錢刀廢耕讀
荒蕪豈暇憂田園墳壟還聞被樵牧更憐北山十萬松
三日坐我圖畫中昔游相顧已非少他日重來成兩翁

念君不歸非得已我亦何爲徒索米葵能衛足葉歸根
莫爲無田誓江水

題鄭子產殘碑

聖門以外數才彥東里大夫真我師區區一鄭支大國
談笑能以玉帛綏井堙木刊誓雪恥陳侯擁社如嬰兒
庇民強國自有術折衝豈僅工文詞君之聲名炳日月
姓字不藉貞珉垂斷石遺文略可辨絕勝六一書斑碑
想其慷慨對晉使晉之縣鄙何國爲豈惟彊鄰氣銷鑠
此語千載令人思夷吾不復出江左太息遺風誰嗣之
題孔經之年文韓齋聽雨圖卽送之秦中

御集卷之三
君家兄弟傳家學各抱遺經與世違
萬里看雲勞遠夢
幾年聽雨得相依
秦中自古詩人住
燕市於今酒客稀
我亦鴿原隔煙樹爲君岐路一沾衣

送孫琴西侍讀出守安慶

皖江形勝綰全吳

帝簡詞臣此剖符
青綬豈能榮

我輩黃堂差喜得真儒
勞心撫字覘新政
回首承明戀舊廬
君去淮陽應卽召
未妨操版學庭趨

書憤

海氣昏昏鼓角悲
邊人延頸望旌旗
空聞魏絳和嘉父
無復陳湯斬郅支
驕虜久忘天廣大
羣公誰繫國安危

漢廷司馬新持節好竭忠謀報主知

八月二十八日漁洋生日孔繡山中翰林穎叔工部招
陪壽陽相公琴西青士少鶴集慈仁寺分韻得代字
古寺澹夕陽長松散秋籟懸弧緬昔賢挈榼成嘉會新
城老尚書詩名冠昭代峇堊二百年壽陽與之配名位
過前人所同俱勇退後生屬多幸撰杖承清誨脫身案
牘中耳目暫愉快有如湯年苗後枯資一漑高閣俯城
闔歷歷見闐闐撫今惜芳辰望古發遙慨溯維新城時
元氣充宇內施宋梅與朱騷壇盛槃敦公如生其間拔
戟成一隊賤子執鞭弭亦或比鄴鄲茫茫歲月徂忽忽

乾坤隘裴公居綠野意豈忘侘傺鐘鼓及園林娛游亦
無奈秋氣古所悲況當送行邁所願蘇民生終期敵王
愾策勳登明堂盛筵儻能再

時琴西將之安慶任

九月十九日霞舉招同桂德山黃翔雲王東浦三兵部
及小樵汀鷺爲展重陽之飲分韻得盡字

今歲重陽嗟可閔竟日風寒雨淒緊衝泥散直車雞栖
發興登高還復忍開樽自笑酒須賒搜篋況無衣可準
豈意嘉招值今夕復對花叢觴滿引主賓犖犖多詩豪
各建旌麾嚴鞞勒德山意趣與時異萬里晴空翔一隼
黃君詩語勝我語退食焚香弄瑤軫楊郎嗜古不余棄

王子繩文常我窘自媿哦詩二十年古人未合時人哂
那逢楊意誦凌雲每被秦優憐陞楯撐腸但有城旦書
朽株安望蒸芝菌邇來聞見異疇昔往往歡娛雜悲慙
相逢一醉得亡何世事萬端甘不敏更憐城南賈大夫
夜來肱篋衣裯盡似遭惡少欺玉川安得昌黎作京尹
何如買觴醉我曹譙語漫邀君一驪

題子衡尊人我園先生風雪夜歸圖圖爲課孫作

兵戈阻絕江邊宅避地棲遲鬢垂白我園梅傍戰場開
遑問巾箱舊書冊豈意連天風雪中復有書聲慰歸客
我昔五齡侍祖旁口授毛詩誦琅琅書齋小杏手親植

別時作花紅過牆冊年萬事成滄桑青鐙之味不可忘
紹興石經殘本

紹興殘石珍片羽楮色斑斕墨花古幾餘宸翰寫遺經
儻不忘讎真令主誰言六籍無神靈能以偏隅抗驕虜
中宮書翰尤絕倫曾寫蘭亭能逼真可憐帝后癖文墨
援桴獨有梁夫人

古民移居相鄰以詩柬之

昔年曾結歲寒盟散雪搏沙事屢更

余小頗朱伯韓皆嘗寓此巷

偶

對棋枰虛夜月每思鐙火共書聲羊求豈意聯新侶沮
溺終期得耦耕君官頻來倘無酒寒宵猶可命茶鐙

悼龍翰臣方伯

昨見除書意已悲，謂君新廢蓼莪詩。
誰知遠道懷人日，正是高堂哭子時。
樽酒歡娛成昔夢，名山事業渺前期。
年來親舊凋零甚，我亦繁霜滿鬢絲。

月夜柬古民

閉關無剝啄，斗室似山深。
燈炮得幽意，月明生遠心。
醉醒千小劫，哀樂一長吟。
獨恨東鄰客，清宵不見尋。

同人消寒第一集，以男齋文集刻成志喜。
分韻得文字，同集者爲海秋、潤臣、汀鷺、子衡、翔雲、霞舉及仲修。

張子昔擯棄，息交辭世紛。
顧我獨何厚，晨談常至曛。
中

年志隱退作亭名棲雲惜哉不下壽老木拱秋墳遺書
轉嶺海幸未罹兵氛後死媿深交力如負山蝨醺金壽
梨棗風義欽諸君高弟職校讎心苦力亦勤眼明喜見
此天未喪斯文披尋感今昔逝者何沄沄二難紹絕學
並足張吾軍一个今又弱痛念失所云吾生能幾何白
髮不可耘高歌奠杯酒庶幾泉下聞

時敬之亡
半年矣

霞舉以弟一集後至復置酒飲同人謂之閨集卽以閨
字爲韻

人生不作醉鄉侯便合移家酒泉郡誰能刺促塵埃中
坐待繁霜上鬚鬢王君結客慕豪舉傭書得錢買良醞

小齋主客靜不譁別院笙歌鬧成陣疏篁負壁意蕭索
有似黃楊遭厄閨世間靜躁各趣舍身外榮枯誰喜
我如棘軸投方穿傳以絺膏堅不運君是今時陳太邱
道高不欲門牆峻百杯引盡盃少休更覩新題搜險韻
次公雖醒亦能狂莫笑醉言忘審慎

消寒弟二集詠冰鐙限忽字

炬火寒斂威清漣凍生骨中含一寸丹外積千秋雪坎
離爻錯綜丁壬氣蓬勃射眸未憂寒炙手那慮熱頗疑
堯年水稽天倏凝結陽烏墮其中終古遭汨沒又疑火
齊珠吐皎蛟龍窟疑然牛渚犀秘怪來恍惚疑登峨嵋

顛朝陽映清潔璇流浸列星玉壺貯秋月抱燠摧圭稜
揚光泯凹凸黠哉誰剗始意匠不可詰冰山尙難倚斯
戲恐倏忽飛蛾方自投難與夏蟲說

消寒第三集霞舉將有兗州之行同人賦詩畱之得且
字

王郎倜儻權奇者一日詩聲滿都下鉅公側席聽談經
名輩題襟邀入社三千年事口能說五十紙書手親寫
煮字從來不療飢衝寒忽秣青齊馬賤子孤吟已半生
未覺曲高惟和寡十上何緣得自通五窮未可輕相捨
每思操版伺顏色不及從師甘楚櫝因君得與數子游

不我愚蒙荷寬假正宜杯酒接從容安用冰霜行跼跬
平生常笑杜陵客茅屋不完思廣廈曾聞爭利必於市
豈有善謀翻適野願歌行路擬鮑昭漫祝歸裝如陸賈
空言畱行諒無益珍重臨岐袂重把野店村醪不足嘗
花底一杯君盍且

消寒第四集潤臣齋中得觀宋槧蘇詩以姚惜抱先生
題句分韻得會字

蘇公大名七百年日月無容更摹繪顧施注本商邱藏
鋟版流傳記嘉泰元明學人未珍異直以表章須盛
代蘇齋雅集歲未百復有吾曹繼茲會異錦裝池蝨蝕

餘卷尾標題盡名輩今古遙遙不相接幸有斯文通沆
瀣我從宣城受詩法上溯樅陽有流派師資凋謝百無
成俯仰存亡一長慨公詩與書非意造用法意常餘法
外每言世俗筆苦驕自作何矜風雨快後賢效顰漫藉
口滄海橫流安足怪但夸嬉罵皆文章豈識恢奇本忠
愛梅翁與我數道此孤論終難息羣喙此本何時入君
手論價奚啻連城倍公昔曾題石鼓詩物理細思滋歎
喟人生百年一彈指仞有觀空等亡賴已知過眼卽雲
煙安用題名增癬疥

潤臣屬余題名其末謝未敢也

爲君更作牛相語

且鬪樽前身現在

潤臣汀鷺招小集以歲晚務閑分韻得晚字

簿書心骨勞羈旅歲時晚月夕得佳招華鐙明酒盃市
近心自遐語長燭疑短緬思癸甲歲畿輔告兵燹豈惟
游讌稀車馬見亦罕人心有憂懼天運或旋轉今來吁
可怪紛華眩愁眼長衢羅車騎列肆沸絃管神州尙荆
棘茲疾非疥癬遵時人豈非見事吾乃淺干愁散一醉
於俗固未免安得魯陽戈揮日三舍返

已未

平陽秦斤拓本

嬴秦政事無足論金石刻畫殊彬彬三千年來茲器存

土花繡作蒼龍鱗岱宗之罌跡已湮嶧山木刻肥失真
此最近古良可珍無事取證獵碣文積古齋款識以此器證石鼓
人日繡山年丈招同朝鮮李藕船樞使小集分韻得至
字

今宵酒如澠劇飲不成醉人日十分寒吟朋千里至李

侯東國彥遠紹延陵季一別忽至今歲月不我貰問年

驚老大未稱平生意官堦聊復進詩律乃愈細擁書送

夕陽開樽納秋氣藕船自誦近作有大開酒戶迎秋氣高擁書城送夕陽之句傾倒

四坐賓棖觸十年事伯蒼與石州論文舊相契盈川喪

楊令吳門失梅尉自君來上都昔游幾人逝金君歿貶

所謂秋史中外理一致吾曹工感慨正坐稍識字相逢
且歡欣時命安足計

悼仲修

汝生不識父孩幼有文性祖母爲汝言兒父苦無命遺
母棄妻子孝慈事未竟汝時方五齡趨前笑而諍謂天
蓋有數難以人力競顏子亦蚤亡何以稱亞聖當時賞
汝懋豈謂數前定自汝來京師所業與年盛孔疏及鄭
箋了了辨途徑餘事爲詞章娟娟冰雪淨吾衰百無成
倚汝爲後勁名山有遺業它日或吾訂去年喪汝兄摧
傷今乃更天心固仁愛容此鬼伯橫已矣復何言老淚

爲汝罄

再集致經堂藕船以春明話雨圖屬題

海東故人別十霜忽乘天風來

帝鄉憶初相識自

慶子筠篲角酒韓與張少年慘綠居末坐祇今髭鬢餘
滄浪問君訪舊幾人在清酒和淚沾衣裳我家宅相君
未見經史貯腹如曹倉機雲經歲並殂謝每值文酒摧
肝腸神仙與人異哀樂笑言滄海三栽桑東風亦似無
喜愠又欲吹綠千垂楊人生有情那堪此縱復沈醉憂
難忘君言宦游不得意逝將歸老煙水旁我聞此語益
氣索聞君無計心彷徨方今 聖人貴柔遠萬國重

譯爭梯杭東邦職貢二百載時有文士朝

天閭願

君努力持使節人日年年升此堂

次韻答潤臣

唐衢唯善哭中散豈能馴夜漏渾難曉秋懷不復春琴
書身外物親舊寢中人賴有今宵酒狂言得任真

題潤臣橋西老屋圖送別

交君恨已遲別君何太速夙昔抱孤介高門畏投足豈
意凡下姿能青嗣宗目薊門饒風沙三月草未綠浩蕩
千里程蕭條百年屋君行歎飄搖我畱苦羈束丈夫志
遠大恥作窮途哭壯語聊相寬沈憂亂心曲別酒氣酸

辛離歌聲急促明日望都門寒煙隔喬木

讀吳蓮洋詩卷

藏園有詩論邊幅譏蓮洋詆訶連新城憑臆爲雌黃吾
觀蓮洋詩乃勝忠雅堂漢唐作者遠詩道無專長德業
非昌黎亦以餘事嘗淺學工剽竊高材恣拍張蓮洋淡
蕩人天然叶官商有如飛行仙驂鸞睨八荒斯文有公
評吾豈私其鄉顧念蓮洋時皋夔盈廟廊海隅正清宴
衣食饒耕桑家居近中條排闥山青蒼昆侖九曲水詰
屈環書牀俯仰何不樂觸緒生悲涼乃知志士心大異
兒女腸夫豈爲一身嘯號學寒蠶我生百年後里社遙

相望執鞭悵無由敬此一瓣香

韓齋餞別圖爲潤臣題

叱馭蒼皇決遠行
觚棱回望不勝情
毛生捧檄甯干祿
杜老哦詩盼洗兵
鳳閣書雲成往事
鵠原聽雨似前生
橋西老屋如重過
依舊雙槐綠影橫

寄子冶

側聞投筆赴戎機
一出興安報解圍
天下自關儒者事
樽前應惜故人非
琴書寂寞吾將老
江漢蕭條汝未歸
寄與樊南惆悵句
春來所得是沾衣

送別汀鷺

楊侯經術今無儕時人走避匡鼎來餘事作詩吾所推
興來一飲三百杯玉山屹立無時頽長安春風桃李開
文章避俗遭世哈卞和再刖非身災楚人自失荆山璣
監河大帥知君才忽然躍馬辭金臺李君餞別傾金罍
四坐無言班馬哀九陌車馬馳黃埃來去了不關吾懷
胡然使我腸九迴半生孤學心自猜與君臭味同岑苔
勸君盡醉休徘徊緘書寄我江南梅明年起鰲聽春雷
頌臣屬題尊人光河先生夜鐙圖

折蘂畫荻古所欽天厚孝慈非自今惟公聲績炳寰宇
公昔圖此猶青衿同時執友盛期許乾嘉名作多如林

兵戈轉徙畱片羽光價不翅雙南金丈夫非慕五鼎食
謂此差足娛親心板輿迎侍列騶唱當時悲喜知難任
後生讀畫感身事卅年歲月何駸駸強言菽水奉歡笑
樂事一往不可尋他年富貴亦時有椎牛但祝神來歆
如公遭遇豈易得題詩躑躅還悲吟

戲答雁峯

干將不以刈艾蒿盤錯之任非鉛刀不鳴受烹材見伐
造物困汝安能逃我生性僻愛文字廿載爲郎今二毛
長官有意拔沈滯謬以庸陋參英髦炎窗署牘日在背
更事敲朴聽嘒號讀書識字竟安用政與胥史爭賢勞

憶昨解官臥鄉里二三鄰交頻招邀山城六月不知暑
文窗四啟風刁騷北山之游更奇絕松聲怒湧錢塘潮
軟紅一墮又三載回首故山心鬱陶中書已禿那稱意
孔方有書頻絕交君詩雖工意乃過不我矜恤翻相嘲
羨君官閒月緡厚何不觴客傾葡萄答詩索飲聊戲劇
郊寒未足當韓豪

雁峯次韻見答復疊前韻

寸田雜菽蘭與蒿欲自芟薙無并刀君詩勁似大國楚
拔旆投衡吾欲逃自言新居美花竹日調冰水烹溪毛
解衣盤礴待月上偶亦開徑延時髦鳳翔千仞自快意

豈知下有寒蟲號我方觸熱秣車馬坐擁一牘忘飢勞
人生稟受各殊分清福詎許尋常邀君家湘水幽絕處
文章風氣沿屈騷展箋一讀百疴失恍隨杖叔觀秋潮
年來簿領汨神智欲混帝虎迷陰陶偶萌結習誰講貫
舊游雲散無新交心聲所發異甘苦我非怨訕君非嘲
側聞西戎近款塞競貢宛馬隨葡萄吾儕不試且宜飲
禮法是非從二豪

張竹汀主事贈詩賦答

王君說子不容口驚喜新詩入吾手未知於古誰伯仲
止論今時豈多有婁梭險韻出新意蟻垤羊腸絕塵走

清秋披雲見華嶽下視吾詩如培塿我昔學此無師承
緒論粗聞白梅叟稍從樅陽溯豫章盡埽鉛華等塵垢
才孱學淺事牽率少日聰明亡十九邇來詩論薄韓杜
坡谷豈堪當擊掇有如評書陋羲獻並廢斯冰用蝌蚪
西子安知里婦曠大癭翻視全人醜從來學古患太似
揚子元言空覆瓿君詩勝我意趣同早識公它能取友
瓣香玉局吾豈敢惜袞一編常頽首公餘退食許過從
更發狂言傾斗酒

竹汀評余詩於古人似東坡於今人似惜抱

竹汀翔雲雁峯招集慈仁寺分韻得聆字

我生後名輩猶及見典型酒壚一憑弔存者稀晨星冥

契嗟已逝發言眾莫聆與君共曹署泛若同池萍新詩
忽枉投秀句如發硎嘉招集勝侶清晝排禪局兩軒樹
薤薤六月風冥冥虛堂敞佛畫恍惚來百靈灑然神觀
肅不復知丹青此地昔初遊協洽歲在丁張侯實剏始
顧祠薦芳馨開成石井闌輦載自郊坰作亭庇風雨脈
泉漱清泠張侯古狂者醉膽吞滄溟探懷出險語俗耳
愁驚霆同袍六七子談謔無畦町中間更廢舉堂庶非
故形鼠跡及燕泥縱橫滿空庭欲話舊時事欹檐語風
鈴斯人久宿草安問井與亭人生等蜉蝣上壽鮮百齡
願效箕子醉無爲屈原醒斜景忽西匿僕夫催展軔主

客並頽然二豪如螟蛉

海秋屬題母孫太安人遺畫

兵燹嗟遷播神靈與護持不堪題畫日回憶授經時性
僻宜官冷兒孤念母慈鮮民同此恨永負蓼莪詩

題朱厚田詩集卽呈逸蘭

弱齡負意氣謂若恆壯少預計今日年所期無不到論
交得王子齊年頗同調時於風月晨互析文字妙兵戈
促離別歲月變形兒須眉各老蒼神智坐銷耗狂奴態
空存俗士頭婁掉觥觥太傅孫風雅厯堂奧挾瑟過齊
門雖工非世好辱投錦繡篇久乏瓊琚報大厦需棟梁

羣才在廊廟所媿非昌黎薦士恐蒙誚相期焚筆硯且
復從戎纔殺賊取金印男兒安可料不然向煙波短簑
學垂釣

悼潤臣

南客相逢御水濱言君消息共沾巾家逢多難生無樂
官未真除死尙貧欲問平安成永訣更傾懷抱向何人
橋西文酒淋漓地華屋山邱迹已陳

次韻答友人

兼旬應訝報章遲潦倒塵容負酒卮
覩句未窺三易法研京已悔十年思
欲迴滄海知無術竟入山林會有時

康濟正須英妙質莫拋心力苦吟詩

楊少初兵部以西法爲余寫真絕肖賦謝

明鏡肖物形物過形亦渺鏡影儻長存丹青失其寶楊
侯出新意人力奪天巧頤頤具凹凸須眉澈分秒平生
半面人婦孺見能曉神魂疑被攝恂恂不自保吁嗟技
至此相識悔不早君看鏡中人已非昔時好更憂自茲
去愁病日衰老慚負幻中真我歎君絕倒

賢婦行爲邊仲思室高恭人作

邊氏有賢婦事姑如母母曰婦賢里黨無間然夫子
遠行役妾畱奉高堂脯脩菜栗醢酒漿問膳視寢左右

無方姑偃息妾歸房課兒書與詩達旦聲琅琅 威姑
終天妾願以身殉哀毀骨立不自意全秋霜春露年復
年憶姑涕泣漣漣 夫子遠行役妾歸故里狂賊震驚
百室流徙妾豈不能徙幼習書史宋宮災漸臺水自古
有死顧謂傭媼汝以幼子亡我死於此 如天之福夫
子歸其鄉會集紳耆練鄉兵鬻我明月璫具餼與糧裂
我繡羅裳製旂與常服志成城士氣倍賊膽不敢窺界
室家復完曰歸京師夫子勤其官家事妾所治驚憂
勞瘁身不支奄奄一病淹牀帷君欲茗飲強起具之君
言少休妾心悲飲君無幾時妾休無窮期 邊子爲我

言氣結心煩冤世上庸俗女婦老壽而乘軒不愁遺斯
人天胡忍旃我詩其事告千萬世曰此婦德之賢
同人小集分詠古人得希夷先生

誰識庖犧一畫天先生高臥抱遺編十年奔走緣何事

世傳希夷詩有十年
蹤跡走紅塵之句五季兵戈賸此賢自古傳經多隱

逸於今識字幾神仙野花嘯鳥渾無恙安得從君太華
眠

微尚齋詩集初編卷四

代州 馮志沂 述仲

庚申

李藕船寄酒器

故人同有杯中興，遠託星槎寄一瓢。
本爲獨醒方至此，豈知孤醉轉無聊。
關沙渺渺魂堪斷，歲月駸駸鬢欲彫。
昨夢與君攜手處，清溪門巷竹邊橋。
我家溪畔路歸夢竹邊橋藕船舊句也

前詩意有未盡復次藕船來韻

春風又綠舊時波，萬里懷人一歎歌。
別後清歡憑夢續，

年來讀律較書多名山久絕千秋望故里其如四壁何
君抱奇才宜著作未應身世託煙蘿

來詩末云此身晚計休相問好向牆

東隱
薛蘿

大雪樊文卿封翁劉子重主事見過談飲竟日文卿有

詩次韻

風雪連旬日經過阻並門衝泥良友聚撥火夜談溫轅

馬疲仍駕

子重駕車之羸方病跛

林雅煉不喧未須身障簾妙墨

映清尊

雁門童子行

從姪灤山巡檢焯之子

童子十四名福基瑤環瑜珥玉雪姿早有才語驚父師

弱齡能解易與詩賊窺灑霍遭劫持身非不能走險巇
恐母不免躬嘗之日夜念母惟涕洟豺狼安識字孝慈
聞兒夜哭爲心悲裏中短刃勤磨治誓不與賊生同時
賊走藥肆方晨炊兒喜竊謂計可施裏毒乘閒投釜錡
賊十餘輩皆橫屍偉哉童子真權奇自仰餘藥甘如飴
殺賊十數賊不疑委棄野寺不以隨荒山兵後難求醫
一瞑不復瞻庭闈異哉童子能爾爲我欲再拜呼以師
忍以譜牒儕孫枝孰狀其事言 天墀謂天蓋高蟣蝨
卑題詩淚墮如綆縻告千萬世無媿詞

次韻畬霞舉

暑日不到地溼雲常在天林煙低過鳥簷瀑亂鳴泉京
國愁霖日家山望澤年清郎枉佳句一爲拂朱絃
未嫌衣帶緩無那鬢霜新歲月頻催老文書漸困人暫
欣詩卷對轉畏夜燈親近得求全毀偷閒向一句
同官張石洲告歸送別

刑官不易爲況乃在今日中材當末流念此忘寢食張
君吾畏友判事無停筆塵牘如牛毛羅羅在句臆吏人
習惰媮頗苦程不識長官意方殷掉臂去何疾比歲才
俊多動侵司寇職矢來每無鄉安能鐵其室嗟余生苦
晚老輩去無迹君在猶典型君行孰匡拂眾人漫悠悠

賤子空惻惻黃河從天來秦晉一川隔中州方戒嚴吾
土豈暇逸似聞急租稅更勸練兵卒願君益審計高臥
古難必不見謝東山終爲蒼生出

哭德山

人生罕百年百年亦夢耳而此一夢中頻見故人死小
別甫再旬不謂君至此心知憂傷人腸熱難自止黃君
痛尤深欲語淚瑩眚設端強一噓了不見可喜我昔未
知君介紹自槐里識君稠人中蒼然古壘洗餘事工詩
文至性在倫紀遇變才恢恢談笑禽封豕胸中萬武庫
惜哉試無幾聞君有夢徵仙班虛左俟吾意仙與人性

情亦相似魂魄猶有知忠孝詎能已願排閭闔叫早使
兵戈弭趙鞅在帝旁鈞天樂方起

次韻再答霞舉

未判浮生事蒼茫欲問天空銜填海石深愧在山泉釀
酒誰干日論兵漫十年封侯縱無意安用直如絃

薄雲收晚霽萬籟一清新淡月如窺客疎螢故近人難
成此夕寐益念平生親早歲桑蓬志蹉跎近五旬
繡山年丈招同朝鮮李菊人鴻臚飲分韻得進字

藕老醉此堂歲月去如瞬宗英得高弟下筆有餘韻韓
齋能好事結客盡豪雋沈李浮甘瓜不覺觴屢進濃雲

閣涼雨几席已含潤撫今惜景光懷舊感時運李侯今
健否多恐雪侵鬢矯首望扶桑欲飛不能奮君歸侍函
丈萬里勞寄訊倘詢近何爲老矣思一郡

題王樓邨先生十三本梅花書屋圖用卷中姚惜衰先
生韻同霞舉

詩人非好奇本與世殊嗜醒固抱孤懷夢亦謝塵事仙
翁親付與理常事非異樓邨逝已遙清芬歎誰嗣我輩
世緣深分爲花所棄愛此三尺圖寒香溢文字茫茫翰
墨因鬱鬱今古思行將老煙霞艸木吾同類調羹彼何
人撲筆發長喟翠羽寂不聞青燈照無寐

子衡隨 欽使練兵江南賦此送別

自從金陵失肩鑰環視虎穴無人探武林一陷益橫決
金甌欲畫江以南潢池盜弄古亦有十年不息民何堪
李君默默百寮底 新命忽使軍謀參轉因王事得將
父豈徒畫錦榮歸驂此邦民力困梳櫛賊取不盡官能
諳算縉計畝法屢變自謂莫四殊朝三時賢藉口豈無
說懼乏軍興非吏貪取民果盡給兵食政使九死民猶
甘柰何疲氓竭膏髓止供國蠹爲淫酣君隨使節事文
牘定有至計療愚慙山陽魯安昔借箸瞭然灼見非空
談願搜奇儔獻幕府筮易無疑朋盍先年來縱浪文字

飲墜歡一往如優曇離懷雖苦強自力鋒車觸熱行趁
趨鄙人往事不足道望君爲洗儒生慚

答海秋

百詩昔作淮上客鐫印不忍忘潛邨上元許君我同里
百年歸夢依松楸詩篇辱贈久不報晶瑩玉版書銀鉤
細尋紙尾忽驚歎五百餘日如奔流當時吳越尙安堵
已爲蒼生叢百憂問君今日復何道何不借箸陳良籌
君言世事姑未暇且玩詩箋追昔游漢陽葉仲去不返
楊郎久客東諸侯長白桂君晚相識樽前一別成千秋
同袍處者不五六李君又去知難畱況因多病遠杯杓

更用何物消羈愁人言我僻君更甚坐有新交常掉頭
醉爲吾鄉友吾命願相啣沫無相尤荷花欲放新釀熟
共君日醉城南樓

廣兒殤

兄子本猶子況負如螟蛉孩提不好弄學父塗丹青讀
書一再過熟若水瀉瓶吾衰無遠志喜汝能甯馨悲哉
丙辰夏一病殘汝形形殘亦已酷今又促汝齡念我罪
狀多宜爲天所刑云何殃及汝神理殊冥冥自從兩甥
亡淚眚今猶熒垂老復聞此吾悲汝豈聆牛梁一片土
憐汝魂伶仃汝祖墓不遙汝其學趨庭虛名爲父子奄

忽終一星蓋棺不汝撫魂夢慚汝靈淒涼百年內展轉
終夜醒鄰家母呼兒蒙被不忍聽

答酒傭

黃塵蔽九陌白日西南馳獨居無好懷出門迷所之故
人念同病濁酒呼共持氣索語不豪臨觴如病癡旁有
酒家傭微笑前致詞得酒合歡喜胡乃屢嗟咨官昔點
朝籍年少未有髭云何二十載局促猶曹司與官同升
者衮衮多華資旣幸無罪過何故見棄遺得無官性情
不合世所宜謂當悔而改何但愁歎爲失笑謝酒傭酌
汝酒一卮汝語信不妄吾憂非汝知

次樊文卿封翁夢境韻

咫尺雲迷海上山，仙人居處有無閒。
金牌久決和親策，玉節頻馳供奉班。
失水鯨鯢仍死鬪，升天雞犬盼生還。
塵寰徧是桃源路，輸與漁郎步履閒。

次文卿中秋對月韻

昨歲思今夕，狂歌百尺樓。
歡場俄一瞥，佳節漫千愁。
虎豹天關夜，魚龍海國秋。
浮雲空蔽月，不爲掩旄頭。

游仙

羽葆紛紛出玉京，神霄有路望分明。
雲階月地高寒甚，水珮風裳躑躅行。
碧海長鯨何日翦，丹山羣鳳爲誰鳴。

塵間多少拖腸鼠妒殺雲中犬吠聲

讀史東少鶴

黠虜原輕漢羣公早避秦幾聞風滅火眞見海揚塵玩
敵成開戶論功失徙薪從來謀不用豈謂國無人

書憤

嚴城未改舊金湯塞上旌旗接豹房魯史自書周榭火
秦兵猶責晉侯糧方壘閑嶠波清淺玉砌金鋪事渺茫
環衛期門皆勁旅可無一矢向天狼

書感次董研秋檢討韻三首同霞舉

中酒無勞問濁清擁書聊復當專城黃精山雪嗟生事

蒼狗浮雲閱世情
高樹不堪秋氣早
小窗猶戀夕陽明
叔孫縣蕝多新禮
迂拙應歸魯雨生

宦情良已淡
世事覺如何
鹽鐵尊桑孔
方書棄緩和
古人隨代遠
寒士得秋多
亦有龍泉劍
塵封久不磨
祕殿閒金屋
離宮鎖玉墀
但求誅斬尙
未敢怨張儀
我醉方憂醒
人歌詎解悲
豺狼天所赦
願且問狐狸

少鶴次余辛亥歲贈詩韻
見示依韻賦答兼呈霞舉
少長憂患中
恐先朝菌死
云何未衰老
聞見遂至此
道逢佩犢人
衣冠劇華詭
柔遠古所尙
奉之過驕子
四海苦用兵
誅求今未已
鹿窮或走險
絲亂恐難理
捐金等

邛山所易惟一紙馬牛暫歸放朝野大歡喜尙惟聖
主心永念初政美寒儒亦何求浮湛眾人裏

文臣不愛錢武臣不惜死大哉岳侯言前聖甯易此宋
金轍匪遙世變日趨詭腥膻污黃圖溝壑轉赤子天下
方倒懸猾虜心未已豈暇憂元元旦夕昧生理白金爲
上幣黃卷成故紙空作楚囚悲能堪鄭人喜北門傷我
艱西方懷彼美悵望千載前蒼茫百年裏

霞舉三疊少鶴韻見示意有所感再答

寇退我猶生寇來孰當死曳兵未百步相笑成彼此異
哉今所聞薦牘恣奇詭巫臣方竊妻華元甯易子追誅

猶有說行賞或可已吾欲逃昏冥萬事付不理不然戒
妻孥蓋棺多置紙復恐造物心頗同俗憎喜全人脰肩
肩大癭固爲美安得從長房跳身一壺裏

不如大國奔分作小臣死復與數公游始願未及此性
命爲人操得失那自詭豈其效焚書欲安反側子不廢
何以興諒彼非獲已生平所遭遇一一難自理功名猴
入袋事業蠅鑽紙文告滿通衢頗有太平喜列肆漸懸
標誰家新釀美共君訪伯倫爛醉竹林裏

天驕

天驕百里尙雲屯白幟搖搖日色昏晉國豈貪嘉父幣

漢朝甘讓夜郎尊
畱都久已無宗澤
料敵何人似柳渾
猶憶林公初秉節
島夷低首拜轅門

詠史呈霞舉研秋

明允論辨姦荆舒匪其讎哲人慮未然惟恐言之售國
忠激祿山哀哉誠拙謀操縱苟自己巳貽宗社羞何況
覆餗材一發不可收桓桓陳將軍裂眦念主憂馬前誅
佞賊忠義垂千秋

次研秋和友人韻一首同霞舉

殘書昏燭影虛幌溼茶煙世事從康嬾浮名謝觸前六
師猶宿野三輔正籌邊漫灑憂時淚吾生亦偶然

慷慨從軍樂蒼茫對酒歌百年空復爾千古竟如何憂
患新知少承平往事多遠慚韓吏部摛藻頌元和
和研秋初冬夜雪韻同霞舉

酒醒衣裘薄詩成硯水凝虛窗明夜雪衰鬢怯寒鐙煨
芋知無分尋梅病未能新霜才幾日倏忽到堅冰

次研秋家書韻同霞舉

觸我鄉關思同君去住難徂東非吉日直北是長安事
往渾無據憂來未有端不眠成坐起失計悔爲官

次翔雲韻同霞舉研秋

國是方難定吾生敢告勞創痍三輔卒裘馬五陵豪短

景催長夜清愁付濁醪
驪黃均一櫪多謝九方皋
殘書愁尙擁客感醉難忘
危甚焚巢鳥癡同入肆羊升
沈三愠喜今古一悲涼
袞袞諸年少何人似洛陽
卽事次研秋冬夜韻

識時羣彥入山深
老我塵埃髻雪侵
早歲一官成繫戀
頻年九日罷登臨
舊游與夢都無迹
衰態如期各見尋
亦欲朝餐適莽蒼
畏聞霜葉下空林

少鶴約過翔雲聽琴
翔雲以二詩見東讀之有感次韻
奉答同霞舉

君言多感觸我痛亦人琴
白首平生約黃壚何處尋
七

絃空在御再鼓不成音誰爲子皮哭吾知醜蔑心
蒲柳與松柏冰霜同一時虛名成濩落壯志迫衰遲更
住原非策能歸已後期此生吾自斷嬾問蜀人著
與客夜話作呈霞舉

亂後還樽酒相看愧此身公卿甯有策盜賊亦無人行
客徐徐返除書日日新誰爲杜陵老灑血痛蒙塵
研秋效山谷體枉贈賦答

君處玉堂蕭爽地清羸端不爲塵勞書從涪老窺褚令
詩溯樊南逼楚騷媿我無文求狗監看人有口說龍韜
此時正用吏持事孤負黃花對白醪

海秋招集寓齋少鶴以霧淞用惜抱韻詩見示同次韻
文書堆案眼爲遮背燈寒縮如棲雅開門視夜忽驚叫
南鄰枯樹冬生花元陰不肯闕光怪銀柯玉幹交槎枒
故人詩箋墮我側頓披宿霧揚天葩繁憂鬱鬱泣眞宰
好語一一穿珠珈想當對酒翦明燭空庭奇石增餘訝
窮冬長夜欲無曉思泛東海觀朝霞豈知王事有敦迫
明晨更膏衝泥車感時頗爲達官怕占歲復覺卿言佳
從來休咎苦難定俄頃百緒紛如麻蚩尤作劇一何虐
藍關雪擁歸無家坐令身世落恂怛今夕夢也還眞邪
吾儕一飯難自飽動憂四海甯非夸且當貰酒共酩酊

鏡中一任霜毛加自古飢腸出奇語昏燈細字隨欹斜
贈翔雲

眾爭方斷斷掉頭去若挽舉俗大笑之黃子曾不恥士
無尺寸柄坐視四郊壘皦然平生心持用報天子

題傅壽毛墨竹

畫長六尺闊二尺竹石奇古自題一詩云一心有所
甘是節都不苦寥寥種竹人龍孫復何所

壽毛昔以我名集詩膽已欲無千秋偶承家學寫生竹
意中豈有文湖州填胸奇氣鬱不收老榦屈鐵枝盤虬
龍孫何所勿須問黃竹闕寒行未休

贈李東樵

曾操雅調得知音，憂患餘生鬢雪侵。
廷論只今誰汲黯，殺人從古屬曾參。
文章已謝庸流福，岸獄知非聖主心。
惟祝九重寬大詔，和風一爲破沈陰。

冬夜集翔雲齋中聽琴限牛字

我初學琴自李侯，焉逢敦牂客并州。
曉燈促坐看挑勾，宵寒漏盡不肯休。
婦孺寂聽無喧咻，時方下第冬未裘。
平沙一曲十日畱，七絃塵封三十秋。
黃壚邈絕亡應劉，今夕何夕懷舊游。
使我對酒生百憂，寒泉漱石咽不流。
微風暗度叢篁幽，丹山孤鳳思其儔。
元鶴警露鳴相酬。

五音盡希十指柔於詩王孟文曾歐並時鍾期不可求
長安萬戶聲駟駟登木之雉鳴益牛識曲誰似汪東周
南鄰北里紛輿騶競呼紅袖彈箜篌吾曹何事如楚囚
共君舉白還相浮蒼梧雲遠天悠悠

次硯秋見贈韻送別少鶴卽酬研秋

雪滿關河送遠行都門風樹作邊聲兵戈未息天心悔
離別無端客意驚夢裏雲山常北向醉中星漢復西傾
羨君玉署蕭閒甚早晚 君王記姓名

題元耶律文正公遺像

像歸董雲舫郎中爲穆相國家故物穆公相業自有

公論惟當時黨籍有士類而無屠沽撫今追昔有足
感者率題志慨於文正事實不暇詳也

天命真人起沙漠角端一言止西略君臣際會幸同時
展卷英風動寥廓五百年來迹已陳故家手澤尙如新
豈惟讀畫寄遐慕更憶當年藏畫人

少鶴畫梅見贈

昔君旅宿夜舉盃敗牆忽見橫枝梅走呼鄰生坐同賞
寒香習習隨風來迫觀始悟畫在壁驚叫不顧旁人咍
想君從此得畫法腕底倏忽春風回早誦暗香疏影句
夢魂不踏江南路都下瓦盆盈尺花人力屈盤少生趣

愛君放筆爲高枝亦似君書能崛奇只憐庾嶺隔天末
烽火鄉關生遠思

觀物

白衣蒼狗漫紛紜一見於今勝百聞庾亮猶能拜陶侃
薛宣何止吏朱雲飢鴟得意鵠遭嚇老鸛方鳴蟻策勳
我欲驂鸞游八極九疑深處覓湘君

和硯秋除夕祭詩韻

晦魄循故常人情重茲夕四十七歲除去我已如客誰
家少年子醺酒呼五白自笑老成翁拈髭向空壁

辛酉

元日口號

爆竹喧初定風來已覺春輕雲烘煖日殘雪潤芳塵塵
市人聲好街衢物色新東華退朝路天仗幾時陳

醉中重過石州故居

腹痛無端酒乍醒故人門巷此重經半生虛願棲雲築

石州嘗卜築雷
橋曰小棲雲亭

千古傷心問字亭後死無成頭已白先

生長逝眼誰青當時一日三秋意十二年來總淚零

贈朝鮮申琴泉中樞

紫霞有詩扇東友昔貺余君家丈人行筆力追髯蘇喜
君繼其蹤對客能疾書初若不經意放手皆瓊琚星軺

後集卷之四
盛賓介袞袞多英儒方懽念當別執手言欵歔達人縱
遠覽四海猶庭除誰能苦相守老作功巨虛猗猗起西
方生人正艱虞懷哉各努力無歎蹤跡疏

同霞舉翔雲招少鶴海秋雲舫研秋及朝鮮申琴泉中
樞徐漢山尙書趙蘭西學士小集以海內存知已天
涯若比鄰分韻得鄰字

近局招邀互主賓談深不厭酒行頻感時難抑飛揚氣
報國空慚老大身四海衣冠瞻北極百年文獻在東鄰
關河此別應相憶好折梅花寄遠人

次文卿見贈韻

世事惟堪大白浮生涯還似上灘舟貧交偶聚難成醉
詞客多悲不待秋蘭省宦情甘寂寞草堂歸計苦淹留
風塵瀕洞行安適且枕殘書作臥游

題范月槎學正仕隱圖用翔雲韻

索米憐臣朔占星羨少微琴書聊自適霄漢任羣飛白
髮誰能避青山不易歸強言託中隱無那此心違

聞道征南卒連營得上游花門仍雜虜米賊又中州桂
玉愁明日兵戈夢昨秋茫茫何所屆人海一虛舟

翔雲以海秋移居同巷有詩志喜賦此奉柬

買鄰自昔須千萬黃子端居得許君樽酒不勞牆上過

書聲時向枕邊聞
花晨月夕開三徑
飲社吟壇角兩軍
憶我同袍曾比屋
十年戎馬各離羣

東海秋

聞君將卜鄰
我喜不能寐
何意再浹旬
五車書未至
黃君詩志喜
如獲百朋賜
東西隔車轍
宛在一室內
索居固吾分
安敢怨遐棄
有如失楚弓
頗復強人意
人生相知心
不以遠近異
曹司朝莫見
各各殊臭味
望宇得二難
惟我戎車利
暇日倘過從
無勞題鳳字

題吳桐雲中翰匹馬出關圖

曾驅匹馬向秋風
一載并州作寓公
似我因人真錄錄

願君投筆莫匆匆文章已恨相知晚樽酒應憐別緒同
不用棄繻驚小吏早知韓范在軍中

出都書所見

惘惘去親故悠悠卽長道曠野惟黃塵殘春未青草孤
樹擢新碧亭亭如自表下馬撫之歎念汝顏色好古柏
多爲薪柔姿慎常保

崇墉環帝京一隅新版築人言庚申秋豺豕所搪突
問誰秉國成謂彼莫予毒黎庶猶痛心將軍但皤腹魏
尙今不存安論頗與牧

對食戲作

早服先師言未敢恥惡食柰此盤中殭蟲臂雜蠅翼未
遑辨臭味觸眼氣先塞始信古人言加餐須努力

卽目

近郭已昏色遙山猶夕暉沙晴轍迹淺野曠行人微愧
負羸驂力愁看倦鳥飛塵勞片時息茆店亦如歸

古北口

絕塞限中外穹廬密相傍赤幟射日明礮車森內向
翠華北巡後於此資保障士卒奔走餘安居氣驕亢追
思昨年事痛惜老成喪將帥苟有人神京固無恙輕騎
扼歸塗閉關絕供帳未屑臣妾之矧與交揖讓吾聞重

洋水險惡非一狀彼敢傾巢來厥志頗難量復思蔣賈
言地險未可杖鎖鑰誰北門停驂一惆悵

憶伯言先生語

昔年伯言交論史慨以慷每言造物心難以人意量南
宋主和者今所謂不祥當時都顯榮後嗣咸熾昌持較
宗岳傳年命誰短長我輩坐讀書難改倖直腸太息憶
此言非用自感傷

灤陽

灤陽行殿鬱崔嵬 仁廟巡游歲一回遺老不知今昔
異自夸重見六軍來

青石嶺遇雨

露泣煙凝垂柳低柳陰沙路淨無泥上山十里濛濛雨
添出山前無數溪

重過古北口

帳扼千盤阻樓凭萬仞梯軍容原整暇客意轉淒迷白
日臨關近青天出塞低微才慚獨對未敢請丸泥

灤陽歸途作

塞外歸來始覺春村村榆柳各鮮新亂山合沓似無路
平野蒼茫微有人久羨田廬容嬾拙尙思談笑靖風塵
至尊日夜憂黔首花石何勞採獻頻

憎驢鳴

蠢爾無長技驚人底不平怪渠王武子嗜好異人情

卽事

清磬出林際行人心灑然誰知結茅者辛苦索金錢
沈仲復編修招陪朝鮮朴璫卿小飲寓樓卽席賦贈
三春不雨塵暗天出門四顧心茫然故人招我坐小閣
坐有海客衣翩跹詩書充腹發奇秀疏髯飄拂疑神仙
亭林絕學世誰繼海外乃肯珍遺編嗟我童幼好奇服
一落紅塵三十年米鹽簿領汨神智寸心有似不墜因
恨君來游今已晚宣城上艾皆沈泉瓣香肯下石兄拜

時人任笑元章顛劇談果勝十年讀此會欲遡蘭亭前
沈君官冷惟青氈醉客不惜囊中錢飛觴揮翰未云已
蒼蒼暝色催歸鞭一麾行復向江海它日念此增憂悵
浮雲聚散那足道愧無長策弭風煙歸向琴泉訪詩老
相思倘有停雲篇

次韻贈朝鮮趙秋潭

宦游真似燕移窩彈劔新成出塞歌世事儘堪長歎息
名流何意暫經過樽前歲月青春老鏡裏功名白髮多
君有詩聲盈日下未知雛鳳較如何

贈申眉南

半生心在白雲窩
抑塞空餘斫地歌
紫塞際天雙闕迴
黃塵埋雨一春過
凋零酒伴歡情少
冠蓋京華昔夢多
江海一麾慚報稱
枉君新句似陰何

贈宋竹陽

休問先生安樂窩
相逢燕市且悲歌
華筵乍喜朝簪集
隘巷難容使節過
水淺蓬萊驚世換
國鄰君子信材多
別來三日增怊悵
千里遄歸奈若何

題裘小華海天長嘯圖

海天不可極
海水空無垠
懸崖孤嘯者
無乃蘇門人
我夢游蓬萊
海竭原可燎
麻姑黯欲悲
方平顧之笑
仙境

苟如此塵寰安可居不如招鶴來乘之游六虛

題沈仲復織簾讀書圖

高華玉堂客乃有山澤韻介然讀書心窮達兩無悶卽
今持使節問俗到三晉取士報 國家無爲志肥遯

東雲舫

驥馳一日爲里千驚馬十駕須拊鞭半生刻意摹漢石
董侯落筆超吾前憶昔追隨子張子海王邨肆時沿緣
偶收異本歸障籠隔宵預輟晨餐錢當時意氣可嘲噓
幾日蹤跡如雲煙張君墓上木已拱我時方壯今華顛
鍾期一逝賞音絕十指久不親朱絃因君頓觸舊時好

更拂蛛網開塵編怪君趨公勞且賢寂寞正似吾當年
將無嗜好與時背有似枿方逢鑿圓董侯董侯勿耽此
勤覩兔豪書院體

次韻答霞舉

愁病侵尋百事乖變遷真似橘踰淮尊前已抱三秋感
別後能禁兩地懷車馬艱難疏近局琴書斥散怯空齋
閉關自笑成癡絕日就明窗寫折釵

戲柬霞舉

心如飛絮沾泥滓捲地東風忽吹起朝官補外古所歎
賀客喧闐童僕喜王程敦迫敢淹畱客路餽糧容料理

平生性懶強趨走日犯炎歊整巾履今年霖雨得閉門
廿載優閒安有此誰令千里行觸熱歸謁三醫病粗已
文非韓子窮難送詩媿陶公酒先止中秋重九看又近
空把霜螯覺無俚王郎百事遠過我飲社獨容先屈指
卽今此事欲代興高築糟邱傲餘子始知稟受分苦嗇
戴角未成翻去齒君如迫以城下盟破戒從君執鞭弭
完貞伏虎圖爲翔雲題

黃子今世人貌古心亦古人笑元章顛我覺魏徵嫵芝
醴有根源英靈在寰宇畫圖示先烈衰懦爲起舞卓哉
談孺人高義繼嬰杵一躍逐波濤羣謀未消阻危辭告

亡靈冤淚漬墳土死易存孤難殺身誠小補艱虞出智
勇夷險歷甘苦提抱兼眾難倉皇守殘譜半生昧庭屏
千里走吳楚曠野誰比隣山君解人語從來忠孝事宜
有鬼神輔嗟彼蚩蚩人人心猛於虎

秋懷八首次研秋韻

宵暑不成寐苦憶秋夜長元陰倏悽懷忽復思炎光人
情有欣厭天運惟故常三舍儻終返甯辭爲魯陽
飛蟲投破窗繁響亂階滴寸心叢百憂一鐙明四壁俄
成故山夢月白萬松碧并載宦何成蹉跎負泉石

狙公芋三四籠物但小數大造簸羣生誰能解其故丈

夫要磊落兒女乃悲訴百歲能幾何乘時觀所樹
平生萬卷書不惜破產求飢寒一朝迫決棄如仇讐
室不自保遑知四海憂忘情學螻蛄曹然春復秋
憂患困懷抱捷中如抵巇豈暇憂未來卽境生然疑造
化頓挫我焉知非福基君看歲寒松不爭桃李時
眾人夸疾走捷足甯渠非蹇者自安步乃獨與時違違
時何足道卻顧同行稀大化日滔滔況此微軀微
陶公酒不足齋恨到身後我飲三十年沈酣已云久聖
賢固寂寞飲者骨亦朽客來勸舉觴唯唯復否否
秋氣易作悲秋日常苦陰寂寥容膝居顚顚擁鼻吟士

無濟世具安用抱此心中材涉末流貽歎不自今

將之廬州任畱別都門諸友

曹司廿六載垂老得一磨疏友爲我賀親者還歔歔古
人出載質不爲寒與饑末俗競華臚此義久已微嗟余
未聞道五十行知非匡時旣無術引分胡不歸貧女晚
乃嫁羞言金縷衣

廬江昔雄郡今爲狐兔穴五馬名雖榮智者固不屑平
生差自信惟恃愚與拙叱馭彼何人念此寸心熱況聞
大府賢戎幕萃奇傑安知肘後印不爲書生設窮通非
一時達者觀晚節

朝入正陽門莫過宣武坊熟之如戶庭欲去情豈忘同
懷二三子道義相拂匡平時一樽酒及此爲別觴班馬
懷故懃孤鴻思舊行我車一首途天末遙相望人生各
有事無爲兒女傷